


321294  
4231  
:2







鶴徵後錄卷第三

未試病故七人

嘉興李富孫既汴甫輯



杜詔字紫綸號雲川江南無錫人康熙壬辰進士原任翰林院庶吉士由大學士嵇曾筠薦舉著有雲川閣集浣花鳳髓蓉湖漁笛譜等詞藁

雲川天才秀逸學有根柢以諸生獻詩 行在

聖祖皇帝特命供職 內廷壬辰會試榜後蒙 賜一體殿試改庶常日與都下名流相倡和當朋賓歛集刻燭分題散華落藻然其襟韻瀟灑超出塵埃之表盛年即告養歸里門庭闐寂凡格清嚴前輩 允菴漁極稱契合今傳雲川閣集



僅有古體詩殆非全本其詞深得白石玉田之意說者謂可  
繼吾鄉金風亭長夫何媿焉

詞科掌錄云杜紫綸少從鄉先輩嚴中允蓀友顧舍人梁汾  
遊工于倚聲康熙四十四年

聖祖南巡以諸生進迎 鑿詞 駕幸惠山又進梁谿望 幸

詞 召見 御舟 賜綾詩一幅已而被 召來京一日傳

待 詔者八人入 南書房 命寫

御製金蓮花賦各賦紀 恩詩一首紫綸獨進一詞拔置第一

旋 命纂修歷代詩餘又 命修詞譜辛卯舉京兆秋試壬

辰

欽賜進士改庶常假歸以原品休致未及試病卒

顧梁汾云浣花風流醜藉詞如其人麗而則清而峭晏周之  
流亞也

沈文慤別裁集詩話云雲川以詩受知於

聖祖會試不第 賜進士入詞館士林榮之而雲川以養親歸  
不復出晚與道士榮漣僧天鈞結九龍三逸社有廬山東林  
之風焉中歲嘗選唐詩叩彈集皆中晚名作故生平得力亦  
在大歷以後云

隨園詩話云無錫杜紫綸先生選叩彈集以晚唐爲宗同余

召試誦送春一聯云自是東風無著處本來西子有歸時

真晚唐也黃莘田亦云人自夸東晉詩惟愛晚唐

劉莘初嗣綰云杜雲川爲諸生時每遇試時輒夢場中試題



論語子之燕居一節秋賦前數日必以此題擬作一藝卒不  
驗至辛卯應京兆試主司爲武進趙公申喬雲川卽以是科  
中式始悟前夢之應甚爲幻合

柯煜字南陔號實菴浙江嘉善人康熙辛丑進士衢州府教授  
由內閣學士方苞薦舉著有石庵樵唱月中簫譜詞

先生爲給諫聳之孫上舍宏本子前徵鴻詞崇樸維楨兄子  
孺染家學見聞殫洽又嘗受業於朱竹垞檢討之門與吾鄉  
周簞谷沈山子暨當湖沈覃九皞日諸前輩往來唱和以詩  
文相質故其詩歌駢體以及倚聲無不擅場咸稱爲謝庭玉  
樹大學士王公頊齡以山林積學薦引 見爲明史纂修官  
鴻詞之舉年已七十有一未幾卒於官

方望溪集云鴻詞檄下南陔疾已亟矣喟然曰方君此舉使  
海內窮士聞之一嗚咽耳

詞科掌錄云嘉善柯南陔康熙辛丑登第以磨勘黜落雍正  
癸卯復成進士初爲宜都令改衢州教授工詩及駢體雙溪  
沈吳二氏刻唱和詩東甫幼牧皆其高第弟子

詞科餘話云柯南陔向有盛名 明詔初下趙鐵崖侍郎卽  
欲薦之後爲桐城方閣學所舉未及試卒於衢州官舍

別裁集詩話云石庵困頓場屋老而始遇一官顛頓以病乞  
身至薦舉鴻博而石庵則已沒矣詩私淑 親炙鈍翁論

者謂得兩家之長予謂不襲兩家之貌斯爲善學兩家者

孫天寅字雲舍江南常熟人雍正甲辰舉人由兵部尙書江蘇



巡撫高其倬薦舉

雍正甲寅蘇撫高大司馬以州郡所舉堪應鴻詞試者三十  
一人試以古學取者六人雲含名在第二次年具題惜不及  
赴徵車而卒

詞科掌錄云孫雲含寄籍吾浙之仁和奉天高公所薦凡六  
人而雲含與長洲朱厚章二人皆不及試而卒雲含與余爲  
同年歿後詩集散亡其從子實君客京師從其抄撮得數篇  
魏樞字又弼號慎齋奉天承德人雍正庚戌進士直隸永平府  
教授由奉天府尹宋筠薦舉著有東易問春秋管見

慎齋研究經學於易理尤深所著東易問自謂生長遼東日  
與東人相問答故敘其原委而集之以示初學其論卦變曰

剛柔皆當指卦不當指爻凡言剛者皆陽卦言柔者皆陰卦  
以剛來柔來指一爻而言固未足以盡其義矣其說亦可存  
春秋管見雜采三傳及胡傳之文以己意附註於後大抵不  
出胡氏之蹊徑

朱厚章字以載號葯亭江南長洲人一作崑山人廩生由兵部尙書

江蘇巡撫高其倬薦舉著有多師集

以載寓居嘉定雍正丙午七月連雨至次年春始晴禾稼不  
登民有饑色歲暮詩云吳氓殫力辦租庸霖潦深秋駭老農  
信有檜巢師鳥雀盡拋糶稔豢魚龍漫空水氣難爲雪照野  
陽威未化松聞道中丞能入告便令寒谷轉春容詞旨微  
婉深得詩人之致



沈文慤朱葑亭遺詩序云朱子葑亭崑山人予舊與相識然  
距百里外無由數數會合雍正甲寅大吏奉 詔徵博學宏  
詞之士葑亭與選來郡城數月予因時過其寓齋葑亭故豪  
於才古歌詩雜文及駢體小詞俱合格又工八法嘗於其坐  
間見笏列二人各執筆磨墨操紙以待葑亭口授一成四六  
序一改友人長律而已又謄寫某孝子傳約千餘言中有得  
令二人參錯書之頃之序成多新語長律亦完善已所謄寫  
極工楷無脫誤中又與予道別後相思語以是知五官並用  
驚其才能是年冬遇病回嘉定明年三月大吏敦促赴徵車  
而葑亭則已先一月死矣嗚呼以葑亭之人之才正宜應徵  
召入詞館以當 國家之求而又值蒐羅人文唯恐或失

僕魁有用之士乃竟困抑屯鬱以死此理之未可知者也後  
四年門下士金子昂千哀集其詩郵寄京師屬前輩張南華  
檢討與予論定因共商確存十之三四其才華發越者如時  
花佳木之應時而榮如驚濤奔湍之逾險而下其安和整飭  
者意有餘於匠枝不傷其本而一切蕭索坎壈冰澤堅凍之  
狀無自而中之洵乎爲才人之詩而不解其中道摧折之何  
由也葑亭工時藝歲科輒冠曹偶長身鶴立儀表軒出衆人  
上四坐喧爭時出一二語皆屈服無枝梧者並著之使讀葑  
亭詩者如見其人

詞科餘話云朱厚章徵書甫下遽以病卒嘉定張檢討鵬翀  
題其集後有云把君詩卷配離騷名士由來多壘坎細探格



律妙毫顛融液精華消糝糲直同崖蜜味中邊豈待微甘回  
苦欖五言况復擅長城山嶽森嚴誰得撼

別裁集詩話云以載言論侃侃五官並用人也歿後門下士  
金君昂千刻其集行心喪禮鄉邦並重之

黃濤楫字逢源江南江寧人廩生由署兵部侍郎王士俊薦舉  
逢源根柢樸茂才藻翩翩薦舉後方以歲貢入成均惜未及  
與試而卒

葉翥鳳字鳴周江南荆谿人監生由山西巡撫覺羅石麟薦舉  
先生殫究經學頗有見解能發前人所未言客遊晉撫石公  
幕中鴻詞之徵卽列名疏薦之

詞科掌錄云葉翥鳳論著淵洽句甬全謝山多采其說未及

### 試病卒

部駁不與試十四人

許遂字楊雲廣東番禺人康熙丙子舉人原任江南清河知縣  
由廣東巡撫楊永斌薦舉

楊雲才學優裕爲清河令綜理殷繁肆應不迫以事呈吏議  
去職鴻詞之舉爲部所駁不得試詩格律甚高清矯拔俗學  
太白而得其神如山月一篇云不知誰抱鏡挂在白雲岑萬  
壑照成雪梅花寒一林美人此遙夜千里結愁心解帶松風  
下霜華流素琴

萬經字授一號九沙浙江鄞縣人康熙癸未進士原任翰林院  
編修由戶部侍郎趙殿最薦舉著有增補禮記集解續纂春秋



鶴徵後錄卷三  
九  
隨筆明史舉要列代紀年分隸偶存

先生爲充宗先生子諸父著書滿屋幼卽濡染家學一切世俗之佔畢不得牽引經學史學俱親承指授後入翰林嘗主山西試事尋視學黔中及報政還京爲人所忌遂有通州修城之役同年趙鐵崖侍郎以詞科應薦先生年已七十有八在同徵中爲最長爲部議所格然亦本無出山意已而三禮開局李穆堂侍郎又欲薦共纂修終恐不能就而止

全謝山鮎埼亭集云公少隨諸父讀書南雷黃子方移證人書院于鄞申明葢山之學充宗先生兄弟最稱高座公侍於席末豫聞格物傳心之教長受三禮說數十萬言春秋說數十萬言於充宗先生又受三禮說數十萬言於季埜先生受

易說數十萬言於世父正符先生受尙書說數千言於從兄言又受明史紀傳三百卷及列代史表數十種於季埜先生受明史綱目及崇禎長編於從兄言復叩性理之學於應徵士嗣寅求漢隸原委於鄭君谷口參攷通鑑地里箋釋於閻徵士百詩公成癸未進士是年公高弟今大學士海寧陳公亦同與省試且同館衣冠以爲盛事及視學黔中廩奉稍優九宗五族之中隨分施之通州修城歸家旣罄蕭然如布衣賣所作隸字得錢給朝夕於是增補充宗先生禮記春秋及從兄尙書說以成萬氏經學續纂從兄明史又重修季埜先生列代紀年以成萬氏史學此其晚年著述也

詞科掌錄云萬授一官編修視學貴州派修城工去職仁和



趙公所薦部駁未試其尊甫充宗先生著有禮記集說未脫  
橐而卒授一闡明遺緒搜擇羣言在衛陳兩家之間可謂繁  
簡得中矣又有歷代建元考晚歲精研分隸時人珍若珙璧  
詩文不多作惟見南宋雜事詩序一篇  
李引樹云梨洲黃子爲劉念臺先生高弟嘗講學於鄞有解  
經會每會舉十三經中疑義數條問難折衷以期闡前人所  
未言萬充宗季埜兄弟皆親受業得其講說充宗邃於經季  
埜精於史卓然成通經師古之儒九沙早聞緒論淵源經史  
所觀彌博所習彌多洵克繼其家學

方燦如字文翰號樸山浙江淳安人康熙丙戌進士原任順天  
豐潤知縣由署兵部侍郎王士俊薦舉著有鄭注拾瀋集虛齋

### 學古文

先生爲海寧徐徵君寶名壻少嘗受業於毛西河太史之門  
稱高第弟子博聞強記自經史諸子百家靡不淹貫於漢儒  
箋注尤能指其舛訛暢發精確鴻詞之徵以前任失察燒鍋  
去職格於部議後主敷文講席口授指畫有叩卽應如傾河  
倒峽無不折服杭堇浦太史稱其學問淹洽以古文雄於東  
南弟菜如亦工詩時以元方季方相目

方望溪集云博學宏詞稱此者實難自計執友之存者惟南  
昌龔孝水歙縣余西麓遊好之久者則嘉善柯南陔淳安方  
文翰乃以四人汜詢於羣公皆曰是誠無忤矣或曰其學與  
行信稱矣而舉者則非宜文翰前挂吏議例不得與於斯其



三人皆就耄矣徵之不能至至矣能入試哉余曰雖然使知實至而名必附無求而志自通於風教亦小補焉又贈序云文輒以時文名天下其於三代兩漢之書童而習焉及成進士則一以爲古文其仕也始出而顛人皆惜其年力之盛強吾獨謂天將開之而使有得於古也

王柳南集虛齋古文序云江浙之間得強筆之儒二人制義外兼以古文詞伏一世其人皆出方氏蓋一爲望溪先生一爲賦溪先生天不憖遺又弱一个而賦溪先生乃以耆年宿德巋然魯靈光特聞先生秀氣孤稟而篤嗜惟書怠以爲枕食以飴口寢饋既久富若生著發而爲文割其膏腴入我爐鞴衆美輻輳與古大適周情孔思流溢簡外班香宋艷浮動

毫端與世之貌爲歐曾以自文其空疏者判若筵楹矣在昔義山之稱韓碑也謂爲點竄堯典舜典字塗改清廟生民詩然後知爲古文者非點竄塗改伐材於古而理以貫之氣以使之則不能句奇語重入人肝脾先生之文融經液史範秦鑄漢而所謂點竄塗改者絕無痕跡可尋如干狐之腋會粹成裘而滅盡針線也如百花之萼醞釀成蜜而化盡渣滓也當此人不說學之世而先生之文出焉用以鉗持啾發吹回蟲濫庶空卷枵腹之徒擺指而退而讀書汲古之士挾轂而起乎

吳澹川南野堂筆記云方樸山先生淹博經籍鉤貫百家不專以詩名世其書家信後句云貧家苦趣多男子樂府傷心



病婦行又壬子元日云坐守庚申憐影隻重來甲子當生初  
於老境苦思中組織成吟轉饒風韻

劉寓槎濬云樸山先生文鎔範經史刻深奧峭雖不襲尋常  
畦徑究非唐宋諸大家正軌恭閱

欽定四庫全書總目云蔡如散體之文亦頗奧勁有筆力然喜  
雕琢新句襲積古辭遂流爲別派誠定論也

張宏敏字訥夫號紅洲江南丹徒人康熙甲午舉人原任湖北  
孝感知縣由署兵部侍郎王士俊薦舉著有紅洲詩集

紅洲爲相國文貞公弟之子與廉察學林爲從昆弟並擅才  
譽紅洲始中副車有詩云瓊樓高迴絕躋攀大藥功成第八  
還行到半天仙骨少罡風復遺落人間

桑菴甫張紅洲集序云紅洲以縫掖徵入金門飶 禁厨被  
宮袍修 祕殿書不可謂不遇然竟阨於春官遲回出宰孝  
昌注上考矣而卒蹶且羈滯不得賦歸來類湘纍之憔悴願  
領以終天之於紅洲何如哉當依光日下其伯父文貞公方  
秉鈞軸又其時風會多有爲求奇材獻所益者而其家羣從  
負熒煌鴻藻俱不得志於有司紅洲於文貞公歿後始僅僅  
得舉京兆此足以見沙隄之無私交而門才之不詭遇爲絕  
無而僅有也紅洲居長安桂玉之地窘旣若東方生而罷官  
還川亦絕無送老資前後奇困幾同拾橡者之所爲華髮蒼  
浪望大江之船帆經石門之風雨夢想故園渺不可卽嗚呼  
其不謂之窮矣乎平生詠歌多情欸九達事理善持論胸有



不可往往借史編陳跡以寫其畫傷之心雖在廢棄猶關心  
見聞疾苦忘我躬之不閱怛然若痛之在己吾又以知其詩  
之本原至深且厚也唐以來詩人之達者若高忠公范石湖  
王弇洲輩一代指不多屈而窮者接跡若一轍紅洲有此編  
足以壽其聲光亦可以無悶矣

傅王露字良木號玉笥又號閩林浙江會稽人康熙乙未進士  
原任翰林院編修由太僕寺卿蔣漣薦舉後晉中允著有玉笥  
山房集

先生以乙未第三人及第入翰林後卽退歸田里不復出山  
孜孜好學至老不勌嘗纂修西湖志一書優游林下頗以著  
述自娛

越風云玉笥先生館選後退居鄉里幾四十年嘗作蓬山望  
闕圖以寓子牟之戀晚號信天翁築信天書屋以卷軸自  
娛年踰八旬尙能揮翰乾隆初年

上眷注舊臣 恩加宮允士林榮之

隨園詩話云人有生而瀟灑者不關學力也傅玉笥先生有  
句云鶯花日辨三春課風月天生一種人嘗同遊西湖年八  
十餘舟中自誦陪申尙衣遊西湖絕句云正是金牛紀瑞年  
小春風景似春天蓬萊原近孤山寺遊舫多停六一泉一到  
湖心眼界寬雲光靄靄接風湍

三朝恩澤深如許莫作瑤池清淺看先生耳聾與談者以手畫  
字卽能通解癸未春遊攝山與之談聲振屋瓦



葉長揚字爾祥號定湖江南吳縣人康熙戊戌進士原任翰林院編修由內閣學士伊爾敦薦舉

定湖爲葉星期先生門下士與沈宗伯文愨稱高第弟子皆請業於二棄草堂討術業之淵源合通門之情好乾隆丁卯歲定湖年八十一文愨年七十五與同門顧處士嘉譽張處士鈺謝徵士淞洲輩譙集於二棄草堂時人比之香山洛下稱爲盛事

隨園詩話云乾隆辛未予在吳門五月十四日薛一瓢招宴水南園座中葉定湖長揚虞東臯景星許竹素廷鏐李客山果江山樵俊俞賦拙來求皆科目耆英最少者亦過花甲惟余才三十六歲得遇此會是夕大雨未到者沈歸愚宗伯謝

淞洲徵士而已葉年八十五詩云瀟瀟風雨滿池塘白髮清尊掃葉莊不有忘形到爾汝那能舉座盡文章軒窗遠度雲峯影几席平分水竹光最是葵榴好時節醉吟相賞畫方長宋照字謹涵號喜墨江南長洲人康熙戊戌進士原任翰林院庶吉士由內閣學士吳家騏薦舉著有禮經彙解史聞息軒雜文等書

先生少孤每讀父書涕泣不自禁事母孝康熙辛卯領鄉薦後登詞館放歸杜門著書嘗謂經學之弊在說理而不證以事失之窈渺史學之弊在綜事而不繩以理失之支離大科之役被薦北上遭部議不准先生在諸徵士中推爲老宿高安朱文端公薦入三禮館悉心編纂以勞悴致疾歿於京邸



詞科餘話云宋謹涵改庶吉士以撰文忤

憲皇帝意革職放還田里同年閣學桐鄉吳公薦復來京部駁  
不得與試當事薦修三禮病卒

胡浚字希張號竹巖浙江山陰人康熙庚子舉人原任河南洧  
川知縣由刑部侍郎王紘薦舉著有綠蘿山莊詩文集

吾浙康熙庚子鄉闈越郡稱盛大半皆知名士如周粹存魯  
啟人徐笠山及竹巖其最著者竹巖學極奧博詩文浩瀚崛  
奇不可羈勒尤工駢體與胡雲持名價相埒瓌麗富贍得唐  
初四家之遺

齊息園綠蘿山莊集序云會稽竹巖胡先生學博才雄久以  
詩古文名天下舊刻綠蘿山莊四六全集臨川李公穆堂同

邑魯公秋厓序之今刻詩集并前編屬余爲序余荒陋烏足  
以言詩古文先生所著元元本本殫見洽聞取精多而用物  
宏功力深而收名遠文於五色其爲天孫之雲錦詩於八音  
其爲廣樂之琅璈乎余讀元黃二賦始覺笑六合爲愚者眼  
猶針孔讀游仙數什又覺登七篇於選者才實逕庭也  
詞科掌錄云胡希張任洧川令以事落職交河王公所薦爲  
部駁不得試駢體最華贍

宋士宗字司秩號崑圃江西星子人雍正丙午舉人原任南豐  
縣教諭由光祿寺卿那爾泰薦舉著有史學正藏學統存

崑圃史學正藏五卷上自三皇下訖昭烈各有辨論凡二百  
三十八條自序云不獲竣事姑取其就緒者亟爲錄出此未



成之本也學統存分二十四門各爲一卷多摘錄前人之說  
大抵攻陸王而尊程朱者

于梓字傅巖江南金壇人原任廣東東莞知縣由兵部侍郎吳  
應棻薦舉

金壇于氏一時門才最盛大科膺薦者三人鶴泉以殿撰兩  
登詞館先生與廣文棧爲兄弟並有才名後文襄公復以殿  
撰至宰輔人多羨之先生以東莞令被議事不得與試

胡期頤字永叔湖廣武陵人原任江西臨江知府由大學士稽  
曾筠薦舉

永叔與顧行人王停交最契顧在河陽顧用方中丞幕有遇  
永叔話舊詩情意綢繆又贈永叔應薦北上有蕩蕩金馬門

今日爲君開之句注云永叔應鴻詞之薦中丞下車時首以

余應 詔余謝弗就

詞科掌錄云胡永叔知臨江府被劾落職寄居無錫之西門  
大學士嵇公江蘇巡撫滿洲顧公交薦之竟爲部駁不得試  
永叔家世通顯祖統虞內祕書院學士父獻徵江蘇布政署  
直隸巡撫兄期恒甘肅巡撫舉主錫山中堂則其姻家也罷  
官後家益貧落所向皆不得志在都時與大興薄學士海倡  
酬最密

葛杖陂雄圖云永叔早著才名吾鄉竹垞太史嘗序其詩謂  
永叔昆友移家無錫相往還酬和者率吳越大夫卿士宜其  
詩之不類於楚遺派也



汪芳藻字蓉洲江南休寧人貢生原任興化知縣由兵部侍郎  
楊汝穀薦舉著有春暉樓集

蓉洲才華博瞻揮灑千言嘗遊都門一時輦下諸公爭相  
羅致尤工駢偶之文可與山陰二胡相亞

詞科掌錄云汪蓉洲教習期滿官江都令以事落職懷寧楊  
公所薦部駁不得試蓉洲工四六少遊京師出入吉水李醒  
齋德清蔡方麓兩宗伯之門都下一時酬應之作皆出其手  
祝維詰字宣臣號豫堂浙江秀水人增監生由奉天府府丞管  
學政事王河薦舉乾隆戊午舉人官內閣中書陞典籍著有綠  
溪詩藁

先生爲斗巖員外之孫清才淵雅詩文深得家法與瑋石柘

坡偶圃諸老交最契時相酬和居京師作燕臺新樂府如賣  
漿行潑水謠縫窮歎太平鼓引諸篇有合風人之旨家住園  
花爲錢氏綠溪莊擅泉石之勝因以名其集

全謝山綠溪詩藁序云今館閣中言詩者共推江右萬先生  
孺廬爲第一嘗顧予邸四顧壁間獨長哦豫堂清明遊陶然  
亭詩以爲冲融俊雅有唐賢三昧集之遺則豫堂之詩之工  
固無待予之辭費豫堂爲人溫文而靜穆夷然自拔於塵海  
之中而不爲岸然難近之狀蓋真詩人之遺也

詞科掌錄云祝宣臣淳郡王禮爲上賓詩出入韓李頗極雄  
放小詩如雁橫孤月飛南北魚噴寒沙趁夕潮京口舟次中秋春同  
好友將離我心逐飛花欲上天春盡市樓過社人稀飲卮舍將



殘鳥亂嘯

高樓春望

家山夢斷眠空好，高館花飛聽轉愁。

春致可

誦也。山陰王公薦於朝，格於部議不得試。

詞科餘話云：宣臣以奉天府丞之薦，部議謂非三品大臣所舉，不准試留京師。

蒲褐山房詩話云：先生少有才名，一直薇垣，公卿皆爲延譽。查張兩相國尤器之，屢隨清蹕，故灤河遼海風景數見於詩。李布衣鐵君謂其怡穆醇靜，沈宗伯稱其出塞諸作激壯，適上蓋是時風雅中巨擘也。然沈淪下秩久之，當出補同知，而非其意，所願量遷內閣典籍，乞病以歸，未及家而歿。余至京師，卽辱先生獎許，以綠溪詩稿屬爲點定，留篋中者垂四十餘年，今始歸其孫世守焉。子喆亦已謝世。

南塾堂筆記云：祝豫堂先生居綠溪莊，曰小方壺，其詩清麗纏綿，樂府體尤佳。如冬夜云：犁星芒寒水生骨，澹月半沈山。砧砧破籬犬作元豹嗥，巷內醉人笑咄咄。風吹草廬小如甕，密林斜漏燈光動。臥憶龍山寺裏遊，殘鐘忽引尋僧夢。山行云：人影松門小，山風石路斜。塞驢欺客倦，嘶入木棉花。詠蟬云：高居無奈爾，秋至亦徒然。誰施螳臂力，清我北窗眠。吳宮云：冷落紅闌徑，裏春吳王臺。榭已成塵館，娃歌舞歡遊。日忘却西施，是越人楚宮云：十二晚峯江上青，楚宮何處闕精靈。只今雲雨年年在，不信襄王夢未醒。秦宮云：殿閣橫江複道開，重關不閉楚人來。咸陽一片燒殘土，都是椒蘭焚後灰。閒立云：短籬數家成小邨，老樹隔水蟠雲根。晚來叉手傍檐立。



鶴齋後錄卷三  
九十九峯青到門江陰句云地荒秋少稻江近市多魚枯樹  
云古苔壓朽骨夜火流空心

邵岷字百峯江南元和人武生由太僕寺卿蔣漣薦舉

百峯學博才敏倜儻不羈僑居元和其所爲詩最工游覽如  
五丁峽雞頭關等作酷慕少陵後復遊燕歸安孫太史叶飛  
送之以詩云舊別九衢裏新逢萬里天流光不相待華髮各  
蕭然乍見還分袂重來又隔年金臺餘故侶爲話老雲煙  
詞科掌錄云邵百峯本吾浙龍游人後遷虎邱爲武生屢遊  
學幕薦牘誤列附生爲部所駁不準試與秀水張庚皆工五  
言古詩而百峯登覽之作尤勝

別裁集詩話云百峯少歲作詩汨於異說總以險怪爲主後  
爲劉君東郊女夫日漸月摩一歸於正至三十餘居然作手  
矣能者固不可測不信然耶聞其七言律詩最工而遺稿散  
軼歎息彌襟

鶴齋後錄卷第三

吳縣嚴良裘校



鶴徵後錄卷第四

嘉興李富孫既沔甫輯

不就試二十五人

夏策謙字恭占湖北孝感人康熙己卯舉人湖南寶慶府教授由工部尚書涂天相薦舉

先生宏才博瞻早有名於江漢間司教湘南與諸生口講指畫往復不勸以故從遊者日衆鴻詞之役邑人涂公所薦以老病不赴試

顧陳埽字玉停江南鎮洋人康熙乙酉舉人原任行人司行人由詹事府詹事王奕清薦舉著有鐘律陳數八矢注字圖說洗桐軒抱桐軒等集



先生性行耿介宗尚陸學舉於鄉六試南宮不中官行人嘗  
給札 蒙養齋又充樂府館纂修雍正元年奉 詔書下浙  
江旋監糶潞河三年以目眚自劾歸閉戶著書四方以幣乞  
文詞者恒填戶乾隆改元被 新綸起官以親老不出辟鴻  
博亦堅辭不行家居奉杖履以爲歡生平精於樂律音韻所  
著鍾律陳數於徑三圍九之說雖仍疎於術其用功已深入  
矢注字圖說譬字爲的以八矢注之一分四聲二經聲三定  
清濁之界四審五音五分陰陽六分正變七分輕重八分留  
送凡八門頗以三十六母爲非

先生與王拙園宮詹書云伏承薦牘采及陳人 曠典重光  
將與六十年前前後輝映緬思爾時雲蒸蔚起何等人物寧

云後來居上亦期足嗣前軌某何人斯敢濫竽於其際哉奉  
檄之下榮愧交并某自引疾以來十有二年杜門守株畧無  
足道惟覺俯仰天倫頗有樂地緣此不自嫌其槁散似可聽  
其無用於世署撫軍與某有舊下車伊始亦見舉鴻博給咨  
赴部某以親老固辭而止今先生雅誼寧不更深但薦舉旣  
同卽去就之間不容有異謹已具陳下情由州達院撫軍自  
必據情咨覆獨是朽木枉雕駑駘廢策仰負栽培拂拭之盛  
惶悚無地如何如何又與方靈泉書云埤通籍以後宦情旣  
淡目眚時作歸而杜門息影菽水盡歡與一二友朋朝夕相  
期務取躬行實踐無何混同用方中丞撫吳猥以博學鴻詞  
見辟拙園宮端亦繼有薦牘以親老固辭不出且思六十年



前已事其體甚優其人亦非易良不願以擊悅之學與浮競  
之徒苟且干進褻此曠典也乾隆辛酉恭逢開設樂部以  
某洞曉音律有

旨宣召時埒大祥未屆讀禮之餘業殖荒落但爲朝廷効力  
不得以服未闕爲辭若非實在病廢不免托故涉欺雖非疾  
稱疾古人有之何如實疾之爲安哉

別裁集詩話云婁東詩人雖各自成家大約宗仰梅邨祭酒  
玉停晚出欲自闢所好而能不離正軌亦後輩中矯矯者

褚菊書字榮九浙江嘉興人康熙辛卯舉人江南上海知縣由  
內閣學士伊爾敦薦舉後陞滁州知州著有易經象數臆解讀  
杜臆說投筆齋集

先生縱覽多才下筆敏捷頃刻伸紙千言名公卿咸爲推挹  
平生無他嗜好以讀書吟詠爲樂知滁州日與州人講學賦  
詩修前賢故事後引疾歸

詞科掌錄云褚榮九有几案才雍正丙午丁未間屢以大臣  
薦召見仍令會試後出知上海縣事旋去職

華希閔字豫原號劍光江南無錫人康熙庚子舉人江南涇縣  
教諭由兵部侍郎吳應棻薦舉著有廣事類賦

雍正間西林鄂文端公宣藩江蘇愛才下士設春風亭招致  
四方賢俊如先生及歸愚先生皆以耆舊見重一時名士罔  
羅殆盡至今人猶樂道其事

方樸山書華豫原事云無錫有奇士曰華豫原歲乙未撫吳



儀封張公坐事逮部使者借制府卽訊於潤州羈管城隍廟  
甲而守之門生故吏無敢嚮邇者豫原聞難自無錫疾馳一  
晝夜踰三百里至京口信焉旣抵廟門不得入顧見有官人  
傳呼來騎而從者數人官人下馬入從者皆入豫原則闖然  
隨之入數折而達張公請室門外卽又不得入徘徊往來門  
者曰客何爲者始吾以客爲從官人來故不誰何客乃今知  
妄男子耳不去且得罪制府怒不可犯也豫原大笑應曰若  
乃以制府嚇我耶向令吾惴惴制府者吾安得來此且天下  
事不可知往者張公嘗與噶禮訟矣無直張公者賴

天子明聖張公撫吳自如而噶卒抵罪以去今張公雖就逮萬  
一如異時事若等何面目復見張公言已則索筆大書其爵

里名姓付門者達張公所曰可達達之不可則以此紙上制  
府言狀惟制府死生時日漸西夕而豫原語侵制府益急門  
者無可奈何則入白守者爲言於張公張公命之入相勞苦  
如平生歡良久辭去初部使者視學江左有聲吳中人士爲  
祠於江陰歌舞之當張公與噶禮交訟部使者按事至吳不  
直張公吳中人固怒甚及是部使者與制府劾張公欺謾不  
讎罪且至殊死吳中人咸涕泣不知所爲會豫原自京口來  
具言張公就逮良苦則益洶洶然顧無所發怒豫原遂倡議  
將部使者祠焚燒之埃起漲數十里制府聞狀大駭陰使人  
廉問主名疏以去然竟無如何也當是時豫原幾不免亦以  
此名聞江淮間豫原好讀書學治古文以涇縣訓導副江南



辛卯解試榜丁酉試京兆復得副榜主試者卽故撫吳張公也識者兩難之

詞科餘話云華希閔被徵以年老不至丁巳歲子紘計偕至京附啟謝舉主吳睂菴少司馬云閔文樸拙不務悅時目十試布政司兩以副榜充貢至庚子始列賢書年近五十矣試禮部文未得達主司之目或咎其拙於進取閔獨自謂非拙也命也守其拙而不變亦命也五十後不與計偕俯仰一室矻矻如蠹魚甘之不言瘁者十年矣癸丑夏詔開博學鴻詞科縣郡漫舉其名達三院檄令就試閔自顧枵腹無可試者以疾辭乙卯秋制府趙公專檄趣徵力辭免蓋壯不如人豈能以踰六望七之年復與英俊爭得失於寸管去夏部檄

至吳有司督促就道知出自閣下薦剡其爲榮寵何如者然

愧悚倍甚陳情江撫咨達大部廷試已竣得雋者皆魁傑

閔通之材以謫陋命蹇如閔者廁其間必無幸焉然則守拙引退以善全閣下推獎之盛心者未爲全非也

隨園詩話云西林鄂公春風亭會文贈華濠原一律中四句云謬以通家尊世講敢當老友列門生文章報國科名重洙泗尋源管樂輕其好賢禮士情見乎詞

王照字晉三浙江仁和人康熙庚子舉人由內閣學士姚三辰薦舉著有論古堂集

晉三與樊榭同舉於鄉並有詩名然兩家各得其性所近晉三以情取勝特饒風致樊榭以意取勝別造深境



詞科掌錄云王晉三少有美才試輒高等處士陸梯霞先生  
掌教萬松書院愛其文以女妻之少宰湯西崖爲陸氏甥風  
雅絕盛晉三恒爲入幕之賓懷清堂集中所倡和諸什是也  
同邑閣學姚公女嫁於湯故與少宰壻汪臺抱璞同薦丙辰  
九月後始來京師明年三月復入溧陽史尙書湖督幕兩試  
皆不與晉三熟於兩漢詩調敷腴圓媚格雖不高情寄特勝  
瞿駿字雲墀江南常熟人康熙庚子副貢生由詹事府詹事劉  
統勳薦舉

雲墀旅食京師雍正中有薦其才行當爲河南令惡其大官  
貪殘不肯爲之屬決棄去天台齊息園宗伯嘗以東漢處士  
擬之終不仕不娶甘於窮困客死其可悲矣夫

詞科掌錄云瞿雲墀未弱冠遊京師期登第後始歸娶而卒  
不得遇所聘妻至五十尙未嫁鬱鬱以卒終其身竟不娶矣  
居西城晉陽菴踰四十年晚節益窮尙耽吟事亦可哀已

隨園詩話云同徵友瞿雲墀曾與章藻功太史蔣文肅相公  
同時角逐名場而流落不偶誓不登科不娶寓京師五十餘  
年而卒余有詩弔之云五十四年蕭寺老終身一曲雉朝飛  
又云雲墀七十生日金江聲觀察率同人攜尊晉陽菴卽席  
賦詩云卅年京洛已成翁經學人推駢子弓酒熟漫將孤影  
勸詩成先揀妙香烘龕燈清晝同彌勒慧業前生定玉童天  
眼視君多道氣紛紛真愧可憐蟲

靖道謨字誠合湖北漢陽人康熙辛丑進士原任雲南姚州知



州告病在籍由兵部侍郎王士俊薦舉後陞江西饒州知府  
先生爲江漢名宿與柯石庵顧左畚輩同登進士第由庶常  
改滇南刺史威德兼至邊民悅服性伉直不能脂韋因病乞  
歸後膺鴻詞之舉仍以疾辭

萬承芴字鳴嘉江西南昌人雍正癸卯進士直隸盧龍知縣由  
通政司使趙之垣薦舉

孺廬先生高才碩學早登詞館以詩文名海內堇浦謝山諸  
公咸爲折服先生亦博涉羣籍當時有二萬之目惜散館改  
縣令未得展其著作之才

聞元晟字名夏號茗厓浙江嘉善人雍正癸卯舉人由內閣學  
士吳家騏薦舉著有竹洲詩鈔

茗厓少工制藝甚有時名詩亦清婉可喜性落拓不事修飾  
爲桐鄉吳公所薦不赴試袁隨園序其詩似未知其爲同徵  
友且以爲雍正進士攷進士題名錄並未有其名噫吾恐一  
二百年後傳聞舛錯而湮滅不稱者豈獨茗厓一人已哉  
袁簡齋聞茗厓詩序云前年冬楊君洪序來山中授一編曰  
此吾師茗厓先生詩也公爲序將刊焉先生姓聞名元晟橋  
李人雍正進士當枚讀先生文時年十二隔三十三年而重  
讀其詩驚且喜以爲文字緣莫先生若也楊君授詩後占卦  
得訟不暇爲開雕事而枚亦無能有所匡定詩久不歸轉得  
時時雜誦清微駘宕想見其爲人高士也年齒過差雖私淑  
卒不得一見然就詩迹其生平蓋嘗入長安游淮海官雁門



登高懷古思鄉感舊未嘗不潛心深思自信其詩之可傳也  
老且死竟不能付梓而存之家家貧子孫又不能付梓以授  
楊君君故豪士甫欲料理旋以禍敗雖精神至者天不能做  
而遲之又久鴻寶不宣當時學文之童子亦將如先生老矣  
悲夫

奚源字湖崙江南當塗人雍正丁未進士刑部員外郎由工部  
尙書涂天相薦舉

黃世成字培山號平庵江西信豐人雍正壬子舉人由兵部尙  
書甘汝來薦舉乾隆丙辰進士授禮部儀制司額外主事著有

平庵詩集

平庵淹博經史薦舉鴻詞以乞假歸未預試裘文達有送培

山乞假旋里詩云藉甚聲華滿 帝京承明猶得領羣英天  
街官種垂楊柳只解縈青送客行注云甘大司馬以鴻博薦  
不就後巡撫阿公欲以經學保薦感而賦詩云上官真有愛  
才心日夜徵書降故林小艇江南帆未轉春風嶺北夢徒深  
百年何意煩三聘一札眞堪抵萬金欲倩殷勤報知己 清  
時未聽濫華簪

黃永年字靜山號崧甫江西廣昌人雍正乙卯舉人由江西巡  
撫常安薦舉乾隆丙辰進士授刑部福建司額外主事出知江  
南常州府著有希賢編春秋四傳異同辨靜山詩文集

崧甫於試時以已任部曹不復預歷轉郎中嘗奉 使江南  
讞獄旋授鎮江知府調常州頗有政譽



詞科掌錄云黃靜山善古文刻有初學文類與說三篇氣勢  
凌厲有西江前輩風

李旭齋蓀華云崧甫詩格高邁不落凡近與劉蘭谷王毅齋  
兩侍御友善倡和甚多其喜蘭谷過訪諸作皆清雅可誦

方觀承字遐穀號問亭又號宜田江南桐城人內閣中書由詹  
事府詹事王奕清薦舉後官至直隸總督加太子太保諡恪敏  
入祀賢良名宦祠著有賑紀壇廟祀典義倉圖永定河志直隸  
河渠水利書述本堂詩集續集

恪敏公少時愛楚詞自懺云愛讀離騷便不祥後以南山集  
獄起全家謫戍黑龍江公與其兄觀永往來南北營塞外菽  
水之資或日一食或徒步行百餘里及壯歸金陵家無一椽  
借居清涼山僧寺有中州僧知公爲非常人厚待之雍正壬  
子入京師有族人某薦入平郡王藩邸王與語大奇之癸丑  
王爲定邊大將軍征準噶爾奏公爲記室

世宗皇帝命以布衣 召見 賜中書銜偕往凱旋以軍功實  
授內閣中書薦入鴻博臨試不赴尋遷吏部主事歷文選司  
郎中出觀察清河累遷至制府公雖貴手不釋卷好吟詩工  
書法善騎射於世事物理瑩徹通曉識力超卓卽當危疑軫  
轡之際能堅持不爲動偉業鴻勳彪炳史策年六十有一生  
子名維甸

高宗皇帝聞之代爲欣喜抱至

御前解所佩金絲荷囊 賜之公賦紀 恩詩有造 膝幾人



容抱子 眷懷昨歲 詔迎醫珠囊佩解

龍衣上 玉食頒嘗敵哺時之句維旬今節制閩浙

錢文端述本堂詩集序云制府太保問亭先生本名家子祖父皆以詩文名於時以族人累徙居塞外先生未弱冠卽偕其兄捆書擔簦重趼徒步歡然相從誅茅結廬奉侍重闈怡怡色養暇輒讀書窮討經籍所爲歌詞道窮苦而記風土孺慕之誠溢於言表惟以事親守己爲安身立命之學初不計寓內功名事業有何梯級可階而先生益不自棄凡險阻扼塞畜牧防守攻戰備儲罔弗周知間亦往來故里涉洞庭游大梁登泰岱泛秦淮歷吳會民情土俗體閱殆備居無何平郡王奉 命統師北路夙知先生才奏請書記蒙

世宗憲皇帝授中書舍人以行軍中鉅細事莫不商榷而先生亦悉出謀發慮無隱

皇上誕膺寶籙遠夷效順奉 詔撤兵於是先生由銓曹擢用

監司躋方伯其撫吾浙也值婺州苦旱民食不給先生設法以賑全活無算其總制直隸也酌盈劑虛釐弊剔弊畿輔爲首善重地先生經理盡善鄰省咸取則焉少時跨驢背坐船屑蓆帽經過所周咨而得至是悉見諸施設向使先生席祖父之盛振翼文壇俯拾巍科如操左耳然不能讀萬卷書行萬里路其詩必不能蒼老俊拔若是卽其才亦必不能肆應通達若是且使先生沈抑患難之餘委靡不克自興又何能宏此遠謨以仰副 特達之知至於斯耶是則天之所以成



就先生者有獨厚矣

沈文慤方氏述本堂詩序云桐城方氏代有鉅人長德臯宗先生以高才生官水部子沃園先生以名進士官中翰孫宮保問亭先生甫成童卽能紹述祖父世業若王謝家聲惟方氏足以當之者歲辛卯以朋舊負辜牽連及禍水部謫戍窮邊中翰奉親遼左問亭省視絕塞往來京畿金陵皖城間人生境遇困窮無踰此矣乃天能困窮其境遇不能困窮其志節於治經讀史暇發而爲詩凡天時之變幻地勢之阻深人事之嶮巖與夫友朋之死生急難物類之詭狀殊形一於樂府古今體中見之洵可謂一家之言增光藝苑者已乾隆十有九年春宮保以三代述本堂詩郵寄予發而讀之水部詩

激壯蒼涼音節高爽中翰詩雄俊廉悍癢結盡銷宮保詩詞達理舉締構謹嚴而述先德感

君恩處流離顛沛之中一歸於和平溫厚祖孫父子若合符節由其涵養深而至性純也方氏初罹患時如霜雪游加並疑其力不能支然境危心泰外物不搖負有爲之才修行遠之詞水部中翰雖殂謝塞外而其言已立宮保以軍功受天子知秉節鉞任封疆爲今之方叔召虎而餘事成詩復足以繼先人之余疋此皆從患難刻苦中淬厲而成者也則始之困之非正所以成之也耶

詞科掌錄云方問亭少被家難謫戍出塞遂習邊情遇赦還里復從平郡王至大軍奏授中書舍人試前一日



上以題密授平郡王時問亭方客王所恐被嫌令勿試桐城方氏舉者凡三人南堂辭不就有名辛元者以經解背謬置劣等問亭有用世之才辭藻煥發宜其一遇而卒不得當人以爲恨

隨園詩話云恪敏未遇時祖父俱以罪戍塞外公南北奔走備極流離清涼寺僧號中州者知爲偉人時周恤之公贈詩云須知世上逃名易只有城中乞食難後官制府爲中州弟子麗雅重建清涼寺殿宇煥然余過而有感亦題詩云細讀籠紗數首詩尙書回首憶前期英雄第一心開事揮手千金報德時又云方制府問亭栽棉花招募府吟詩多至數十韻桐城馬蘇臣曰我止兩韻提筆云五月棉花秀八月棉花乾

花開天下暖花落天下寒方公擊節不已又云方恪敏公勳位隆赫而詩情極佳未遇時途中看花三絕云數枝紅豔困輕塵隴後風前別有春袖底飛英吹特地似憐驢背有詩人女兒裝罷鬢鬢底桃花一面酣結伴前邨攜手去每逢花處又重簪稽首茅庵古白華道旁人獻道旁花慈雲座下無多願但願花時客在家又云恪敏公六十一歲生兒當八月十二日賦得子云與翁同甲子添汝對中秋

時公在  
濼陽

塵定軒譚粹云方恪敏公少棄舉子業專力治經尤長說禮嘗欲辨證三禮博采歷代禮制考其因革未及成書聞秦文恭公修五禮通考以叢藁畀之故通考中多著公說公性嗜吟詠治事之暇執卷高吟每至丙夜其未遇時詩及從軍之



作有東閭剩橐等八集與先世遺詩同刊總名曰述本堂集  
後官中書出爲監司歷制府有薇香燕香等集編爲述本堂  
續集

馬曰璐字佩兮號半槎江南江都人監生候選知州由通政司  
使趙之垣薦舉著有南齋集

韓江馬氏小玲瓏山館儲書之富著於東南半槎與兄嶰谷  
竝擅清才博覽旁稽沈酣深造不僅充漁獵之資曾編有叢  
書樓書目若干卷一時名流交相傾倒吾浙如樊榭堇浦謝  
山諸先生咸主其家畱連款洽竹西觴詠之盛於斯爲最  
詞科掌錄云江都馬佩兮藏書甲於大江南北詩筆清削有  
兄曰瑄秋玉亦賢士有詩才

杭堇浦道古堂集云半槎兄弟不以俗學繕性而志不求時  
名清思窈渺超絕塵埃親賢樂善惟恐不及方聞有道之士  
過邗溝者以不踏其戶限爲闕事

陳授衣云嶰谷兄弟性好交游四方名士過邗上者必造廬  
相訪近結邗江吟社以倚聲與賓朋酬倡與昔時圭塘玉山  
相埒

隨園詩話云馬氏玲瓏山館一時名士如厲太鴻陳授衣汪  
玉樞閔蓮峯諸人爭爲詩會分詠一題哀然成集至今未三  
十年諸詩人零落殆盡而商人亦無能知風雅者

周京字西穆一字少穆號穆門晚號東雙橋居士浙江錢唐人  
廩生由內閣學士姚三辰薦舉後考授州同知著有元悔齋集



穆門爲人淵靜早補郡學生學使彭公始博目爲國土工於詩嘗與厲樊榭杭堇浦諸人爲詩社咸以穆門爲主持中年南游閩海北燕趙西秦晉所歷山川墟莽多所寄慨書法奇逸酒酣興發數十紙立盡後以貢入成均考授州丞晚歲息影蓬廬縱浪湖山醉題酒樓壁好事者競鈔詩貰酒有詩價高如酒價高之句終連蹇不遇以死樊榭竹田相與論定其詩山陰舒令堃畝爲之雕板以傳

鮎埼亭集云穆門以詩名天下五十餘年平生嘗徧歷秦齊晉楚之墟所至巨公大卿皆爲倒屣顧終於蹭蹬不遇士無賢不肖皆曰周先生長者乃其中則有確乎不可拔者大科之役姚侍郎薦之力辭不得應徵至京徘徊公車門下數日

稱疾卒不就試以歸杭之詩人爲社集羣雅所萃奉穆門爲職志詩成穆門以長箋寫之醉墨淋漓姿趣頽放或弁數語於其端得者以爲鴻寶湖社風流百年以來於斯爲盛皆穆門之所鼓動也尤篤於人倫之誼其婦賢而頗不得於其姑穆門戒之曰黃涪翁之姊文城君困於洪氏雖有三令子莫能申也汝其善事姑矣婦卒以是困悴死穆門事其母益孝不敢有幾微見於顏色然私憐其婦終身不更娶以報之有弟已析產乘穆門出遊而鬻其居穆門歸更僦屋不以一語及之其爲人可想見也

桑嶽甫文集云西穆里居見面垂三十年前歲長至日同廬玉巖論交金牛湖之四賢閣各賦七言古詩一章三人約爲



昆弟交數數過從今歲周盧申之以昏姻盧之女孫余外孫女也許字周之孫書札往還甚歡

厲樊榭南宋畫院錄云馬和之畫有楊妹子題周京題二絕云雙龍小篆玉錢圓淡墨香消五百年遙想署書楊妹子綠窗朱戶繡簾前洗盡鉛華馬傅郎獨留綵筆帶宮黃鳳凰山下莓苔路露井寒林幾夕陽詞婉而寄慨特深

別裁集詩話云少穆足跡遠到欲結契字內英傑 召試鴻博不遇歸時借一二友生遊讌西湖賦詩寫懷蓋自此無四方之志矣詩體和平中正不爲錢刻艱深之語

炙硯瑣談云周穆門同友人湖上句云野鷗導我有閒意新柳笑人成老夫風趣可挹沈歸愚宗伯亟稱之

隨園詩話云余幼時遊西湖見酒樓號五柳居者壁上題詩甚多不久卽汚去惟西穆先生一首墨瀋淋漓字寫爭坐位帖歷七八年如新酒樓主人及來游者皆護存之敬其爲名士故也題爲冬日同樊榭放舟湖上念欒城赤鳧都已下世彌覺清遊之足重也分韻同作云一角西山雪未消鏡光清照赤闌橋小分寒影看梅萼半入春痕是柳條閒裏安排塵外跡酒邊珍重故人招孤燈落日空臺榭歲晚重來話寂寥後四十年余再至湖上則壁詩無存西穆樊榭久歸道山而酒樓主人亦不知名士爲何物矣

鳧亭詩話云周穆門山行詩風從荒野過來橫雪向雲山莽處明寫景非淺人所能道而莽字亦非老手不能下



李引樹云穆門詩源出劍南厲樊榭以高岑豪健比之在一時詩社中酒旗茗盃拈韻分題足以傾倒流輩

周振采字白民江南山陽人拔貢生由兵部侍郎署江蘇巡撫顧琮薦舉

白民詩材清雋負盛名於時後漕運總督瑚公寶以經學保舉有篤志窮經持躬純樸之語

齊息園周白民小傳云海內言時文者無不知有山陽周白民先生幼卽端謹好學年十五入郡學試必冠其曹困躓棘闈者數十年竟以選貢老然淮海言經學品行彷彿古人者必曰先生生平樸誠恬淡視勢利聲華得失毀譽人情欣戚百變泊如也與人交人皆服爲飲醇至於節行之大一意孤

行毅然不可奪尹公博野嘗稱曰進止不愧儒者近世文人中罕見自幼至老寢食書卷中研精覃思自標清醇一格於前明章羅陳艾之外凡數百篇方公望溪稱之至不容口方樸山先生曰白民經學不必盡逮古人而能到古人之所不到其於史不喜觀大意而心解處出人意表乃適得古人意中士林以爲確論後督撫以孝廉鴻詞及經學三舉應詔皆不就家居待選教職自訂其已刻文存數十篇卒年七十詞科掌錄云山陽周白民薦至京師病不就試有盛名於江淮間詩宗選體時有遠致

詞科餘話云白民以病不得試北闈復報罷山陰胡天游爲賦明妃曲三首送之



別裁集詩話云白民制義比於天半朱霞雲中白鶴典江南  
試者每以不得白民爲媿然終於不遇天也詩不多作亦矯  
矯拔俗

李引樹云白民工於詩尤長制藝與同里劉萬資王鏡湖程  
風衣契最深析疑辨難過從無虛日曾邀一時名手結課於  
曲江樓金沙王墻東評選授梓以白民爲巨擘杭堇浦詞科  
餘話選其手抄子史書後詩十首亦足見其底蘊

奈華瑞字西麓江南歙縣人貢生由內閣學士方苞薦舉

先生植學敦行爲海內耆儒應 召至京意在觀 盛典訪  
友朋識宏才終以老不就試而歸

方望溪送奈西麓序云吾友西麓博學有文名稱蓋州部而

少壯未嘗一至京師近六十忽來游叩之曰昔吾有弟能服  
賈以養吾親吾是以能不離親於外也吾弟死而家落父不  
能葬母無以養故顛頓至此館於余踰年凡春秋霜露未嘗  
不痛其弟也風雨寒暑未嘗不念其母也一日告余將南歸  
曰吾女弟之夫死吾不歸吾母疾將作矣因叩其家事始知  
西麓少失母母撫之不異於所生而西麓之於弟妹亦終其  
身無間疑夫古稱孝者多以後母之不慈而彰而西麓之孝  
乃以母之慈而隱是其母子皆可風也又再送南歸序云雍  
正八年議開鴻辭科西麓以乾隆元年孟秋至余曰子尙能  
卽事耶曰吾腕不勝書數年矣固以請而有地治者難之戚  
友致道齋念



聖天子方興至治吾扶杖天衢以觀德教且得與衰殘執友講  
問逾時而歸此行豈虛也哉衆試畢余告二相國將舉君爲  
太學六師兼纂一統志二相國以爲宜而西麓決意治行曰  
吾始願已畢矣子視吾年力尙能有立耶將以爲名乎抑有  
所利之也西麓孝友文學爲鄉國所衆信久矣茲行也又以  
見君臣朋友之義進退辭受之衡故詳敘之以贈其行  
龔纓字孝水江南江寧籍江西南昌人貢生由內閣學士方苞  
薦舉

鴻詞之徵方望溪先生以稱此甚難惟孝水及奈西麓柯南  
咳方文翰四人能無愧怍因特薦於 朝而孝水亦以病不  
能行

蘇珥字瑞一廣東順德人廩生由刑部侍郎楊超曾薦舉

元和惠天牧學士視學粵東獎拔高才瑞一與羅天尺何夢  
瑤陳海六時稱惠門四子與學士子松厓講論文藝爲莫逆  
交

方貞觀字履安號南堂江南桐城人生員由都察院左都御史  
孫嘉淦薦舉著有南堂詩鈔

方氏南山集獄起族人俱牽累被禍先生與望溪先生皆隸  
旗籍後遇赦放還羈孤連蹇生平刻意爲詩骨格清醇深得  
唐賢微旨

李可淳南堂詩序云履安詩凡數變最初學張籍王建旣又  
學孟東野三十以後盡棄其所素習沈淫於貞元大歷之間



銛鍊淘汰獨標孤詣務極雅正

詞科掌錄云桐城方南堂康熙癸巳以族人牽連隸歸旗籍雍正元年放歸屢客揚州左都御史興縣孫公所薦辭不就試詩體惟律最工五言尤勝

詞科餘話云方南堂總憲孫錫公先生所舉士也丙辰三月徵書至老不能赴有言懷志感上孫公詩云身事支離雙鬢白可憐遭際十年遲部牒復至備見敦迫終不能赴

隨園詩話云遊仙詩大半出於寄托方南堂居士云到底劉安未絕塵昨宵相與共朝真漫將富貴誇同列手版橫腰道寡人此刺暴貴兒作態者也又云南堂有無意懷人偏入夢有心看月未當圓之句人傳誦之其他如閏年入夏花猶在

積雨逢晴草怒生皆佳又云桐城二詩人方扶南與方南堂齊名魚門愛扶南余獨愛南堂何也以其詩骨清故也如風定孤烟直天遙獨鳥沈因潮通估客隔葦見漁燈又清風時一來悠然復徐歇真陶詩之佳者

蔡寅斗字芳三號九賓江南江陰人監生由翰林院侍講福建學政周學健薦舉乾隆丁卯舉人授國子監學錄陞助教

芳三淹貫羣籍甚有文名於時已巳工部侍郎何公國宗以經學保薦當時有忌其名者沈文愨有詩懷之云高才於世真何礙流輩偏多忌姓名願爾養雞師紀消莫教盛氣與能鳴

沈文愨松陵詩話云芳三工古今文及駢體韻語聞四方有



才人必遠道走訪之與之定交蓋以文章友生爲性命者也  
壬申 恩科會試自經於號舍中不解其故人謂之遇崇文  
人之厄一至此耶

和邦額夜譚隨錄云蔡寅斗江左名士也公車入都館某氏  
家其家主人物故已久主母待之甚厚一老僕亦素重蔡名  
甚喜幼主得師敬禮不替會以事致僕縊死次年蔡入闈精  
神恍惚下帷解帶自經比人知覺體已冰矣尤可怪者面壁  
端坐帶纒去喉寸餘不解何由致死

袁樸村松陵詩徵云先生天賦警敏博綜典籍爲文必自出  
新意無一語拾人牙慧教弟子能因材造就勤懇不倦嘗授  
經予家循循善誘轉瞬數秋哲人長往甚可痛也

翁照字朗夫號霽堂初名玉行字子靜江南江陰人監生由南  
河總督稽曾筠薦舉著有賜書堂詩文集

丙辰諸徵士得親前輩緒論者甚少先生曾請質於西河竹  
垞兩太史學術淹通有倚馬之才當代名公卿咸相敬禮如  
相國錫山嵇文敏公渤海高公並稱老友應 詔入都血疾  
間作未及試文敏招至幕中已巳高相國以經學薦亦不遇  
後周石帆學士贈詩云徵書同憶赴詞科拄腹推君萬卷多  
又云一日百函真作手十年三賦早名家

杭堇浦翁霽堂文集序云江陰有淵懿純篤修潔博習之君  
子曰霽堂翁先生讀書經世務以詞學經術屢列大吏之薦  
牘



天子知其名氏將 召而收用之而細於時命給 大廷之筆  
札條石渠之異同皆以病不能與退而結茅於青山之陽將  
遂沒齒焉而已年幾大耋矣霽堂負美才往來江淮之間舟  
車刺促將爲畜妻子營衣食之謀并其窈渺之思英絕之識  
綸爛之文章悉舉以供有力者之用其所爲抒性情導勤苦  
夷猶而自得者十曾不得二三存焉獨其說經之文則以自  
伸其獨見而又爲當世之所不好故僅而得全嗚呼其可悲  
也已今河道總督東軒高公禮部侍郎歸愚沈公皆於霽堂  
爲深交將盡采其所爲詩歌雜著以托之久遠所以慰霽堂  
者至矣霽堂過武林揖予而請曰微子言無以申吾之隱微  
而答二公之殷勤有是哉吾以詩若文以衡量霽堂而霽堂

之生平見不若以霽堂之病衡量霽堂之詩文而霽堂之生  
平愈見霽堂少嘗失血以是終其身而不得寧息方病發時  
隱几臥伏面無人色千詩百賦誅求踵接霽堂揮霍應之精  
氣奕奕曾不異居常無病時且若較他人之不病者而尤工  
且密焉霽堂之才令其力疾以應 明詔必有一當而猶嫌  
謙慮無以稱側席之求而副舉主之薦其矯然不欺其素於  
茲可觀矣霽堂之於經穿穴牢固搜擇幽滯析羣言之精發  
諸儒之覆雖號爲經師者猶不能窺其窔奧而指其玷尤其  
何所暇而得若此意必其隱几臥伏時冥心孤往深探而樂  
玩之而後乃能臻此純粹以精之一境也

沈文愨翁朗夫詩序云康熙戊子歲江陰翁子朗夫謁余於



葑溪故居述遠道命駕之故謂子詩能追逐古人讀之既久  
若飲食嗜慾之難遽舍也及出所自爲詩過余之樸拙遠甚  
由是流連日夕唱和於鳴榔釣車間兩人遂得定交後朗夫  
留海陵留中州間歲偶歸歸偶遇以詩相商權後留遼左之  
錦州余或客南徐客鹿城婁東客臨安踪跡漸疎後朗夫受  
相國嵇公知薦應博學鴻詞之詔乙卯夏來京師與予復  
相見於燕臺客舍明年冬朗夫病嘔血未及應保和殿試  
余亦鍛羽歸自是或出或處踪跡又疎歲丙寅余請假南還  
復遇朗夫於治河制府完公署中距初相見時已三十四年  
卽召試離別時又已十年朗夫少余四歲鬢毛俱白而余  
之精力益頽然坐廢然朗夫年旣長學殖益醇詩品日益上

讀其近作語超格俊氣澹韻流中多見道親切語雖多師爲  
師而載實杼文軌途自一向特賞其言語妙天下者祇品其  
平時雕琢之工而不足概其老境也

詞科掌錄云翁朗夫德性醇謹篤於氣誼少以所業質蕭山  
毛檢討檢討序云意充而舒度遠而不拘於隅其才思縱發  
所至開適質無不足而文又具其有餘見賞如此壯歲歷遊  
大幕章奏尤工錢唐沈垞云豈有後山四六之工乃無子蒼  
二三之嘆非虛美也

詞科餘話云朗夫病不與試旣從錫山中堂出都後復從盧  
中丞來京師詞科同籍諸君握手道故皆有詩送其之錢唐  
隨園詩話云江陰翁明經朗夫館嵇相國家相公非朗夫倡



和不吟詩人呼爲詩媒乙卯以鴻博薦朗夫謝詩云此身得  
遇裴中令不向香山老一生一時傳誦朗夫有春柳云千里  
因依惟夜月一生消受是東風迎來桃葉如相識猜得楊枝  
是小名皆佳句也平生有謙癖拜起紆遲年登八十猶熏衣  
飾貌寸髭不留余初相見知其多禮乃先跪叩頭逾時不起  
先生愕然余告人曰今日謙過朗夫矣又題霽堂三十三山  
草堂圖云四海才名六十春青鞋布襪軟紅塵平生事事謙  
冲甚只有青山不讓人試罷 彤庭戶不開談經重薦伏生  
才一時猿鶴驚相顧花外蒲輪今又來

別裁集詩話云朗夫小心敬慎雖僕隸下人不衣冠不見也  
事上接下以誠以禮稽高二相國先後以鴻博經學薦皆不  
遇與予相約爲耦耕伴侶結廬有日矣乃倏焉徂謝友生爲  
位以哭多失聲者少年詩專工佳句後漸臻老境識力俱高  
有虞伯生老吏斷獄之目

蒲褐山房詩話云霽堂少時曾奉教於毛西河太史西河序  
其詩盛爲推挹嘗詠蓑衣有風雨一身秋之句從此得名後  
在浙幕中詩亡失大半今所彙賜書堂集十之三四爾其爲  
時傳諷者則有一抹夕陽連漢苑二分春色在蕪城小樓夜  
半朦朧月深院秋千澹宕風青拂河橋風乍轉綠昏江店雨  
初來春寺煙深聞粥鼓午塘風暖度飴簫一聲啼鳥破春寂  
數點落花生暮寒殘月半痕巫峽曉夕陽一片洞庭秋關塞  
梅花愁裏曲池塘芳草夢中詩夾岸綠陰垂柳渡滿篷紅雨



落花天沈椒園臬使云先生年高藤杖方袍須眉朗映其詩  
風致盎然而神韻瀟灑、

陸榮秬字錫三號香林江南華亭人監生由都察院左副都御  
史陳世倌薦舉著有香林詩文集

香林居邑之陳山少著文譽歷試有聲後引例入成均素與  
焦南浦友善詩歌酬唱晚尤耽心禪悅南浦嘗謂累心處都  
盡惟香林足以當之

蒲褐山房詩話云香林以薦預修駢字類編又經海昌陳公  
疏薦博學宏詞不赴其詩極清麗和程中丞梅花十首如雲  
塢無聲喧翡翠月溪有影浸玻璃數瓣漸開春色面一枝常  
抱歲寒心忍笑似憐經歲別褪寒如兔積年通十霜參破干

場夢一笑能生四海春青巘忽開羣玉圃碧霄飄墮蕊珠仙  
數點疎星明小院一聲橫笛斷高樓此去年華誰獨擅小來  
風月早能勝雲深竊恐成龍去風軟還宜伴鶴來半林艷發  
瓊田暖萬樹光搖珠斗寒能開生面不爲青邱諸賢所束

陳撰字楞山號玉几浙江鄞縣人布衣由通政司使趙之垣薦  
舉著有玉几山房吟卷繡鈔集、

玉几敦古絕俗詩筆高超清削如其爲人尤工畫著墨無多  
翛然意遠一時爭寶之屢遊江淮間青鞵布襪羣目爲高士  
雖窮愁寡合悽斷怨咽之音時見於詩而其閒曠固自若也  
杭堇浦玉几山人小傳云玉几性孤潔不肯因人以熱煦鮮  
榮而侈洽汰詩有逸才天然高澹不琢自雕讀書不多室無



鶴梅後錄卷四  
三  
儲籍卒然語及輒能條其出處亦未嘗見其挾一冊咿唔也  
游道甚廣胸中無軒冕數數稱道者禹航嚴定隅廣陵魏旭  
棠而已有敬通之婦無伯道之兒終身甘旅偶一歸轉如旅  
人客鑿江項氏彝鼎圖書之富甲天下充塞眼孔亦未嘗向  
人辨真贋矜鑒賞別館子居如退院枯僧僕人娶妻生子衣  
食資於主人了然不以爲累舉鴻詞不就項氏亦中落江都  
江鶴亭迎而館穀之書無師承畫絕摹倣每一紙落人間珍  
若珙璧歸老江鄉買山之計甫成大耄之嗟俄及詩有繡鈇  
集秋吟已刊行後不多作亦不肯以詩酬應人

詞科掌錄云錢唐陳楞山布衣自稱鄮人初有繡鈇集秋唱  
儼古諸刻壯歲以來客於儀真長年不歸意思蕭澹屏絕人  
事詩意冲逸高簡通政寧夏趙公祭告南鎮聞其名薦於  
朝辭不赴有謝啟極工

蒲褐山房詩話云楞山爲毛西河弟子又工寫生以墨暈之  
若不經意者而蕭疎簡遠品格極高亦不苟作故時人寶之  
余定交邗溝時年已六十餘戍削而修望之若聞鷗野鶴嗜  
吟詠今所傳吟卷蓋一鱗半爪佳者或不盡是也然句如二  
分明月樓頭影十里平山檻外雲兩時茶板伊蒲饌一樹梅  
花貝葉書詩卷白頭悲舊雨燭花紅淚滴秋堂焚香自寫圖  
中影把卷何須絃上聲饒有晚唐人風韻

梧門詩話云楞山又號玉几生蓄書畫最富精賞鑑詩格高  
簡古蕩歸途云日暮東風急歸途雨正繁泥深黏屐重雲濕



帶林昏野水喧漁艇人家掩竹門遙憐折梅處回首更西村  
楞山工畫其詩不媿有聲畫矣

程松門鳴云楞山修行讀書粲然古處厭棄流俗如驚絃之  
雁見機之鷗故其文章械用不存落筆高妙而有韻之言亦  
復戍削簡別固已掩抑摧藏嵇心羊體泠泠清清徧七絃而  
沈萬木繡鍊一集篇什雖僅足以徵其微詣之所在

屈復字見心號悔翁陝西蒲城人布衣由刑部侍郎楊超曾薦  
舉著有楚詞新注李義山詩意江東瑞草集

悔翁性迂僻工於詩兀傲自喜所注楚詞采合舊註自以新  
意疏解之有得騷人言外之旨義山詩意惟在就詩論詩亦  
頗有獨得如錦瑟碧城無題諸篇前人穿鑿附會之解一舉

而洗之

詞科掌錄云乙巳丙午之間屈見心來遊四湖居紫陽山道  
觀以所註漁洋秋柳詩徧謁名流古詩闌單少力惟律調近  
熟晚遊京師弓刀宿衛之徒皆從受業頗有詩聲遂自尊侈  
論詩則詆訶老杜注騷則倚據紫陽每爲士夫所鄙其流傳  
之詩有不必爲之題如書中乾蝴蝶水中雁字多至數十篇有不可通之句金  
壇史公度曾舉其楊花詩予存其可通者

隨園詩話云丙辰以布衣薦鴻詞者海內四人一江西趙寧  
靜一河南車文一陝西屈復一嘉禾張庚車之著作余未經  
見張善畫長於五古人亦樸誠獨屈叟傲岸自號悔翁出必  
高杖四童扶持在京師見客南面坐公侯學詩者入拜床下



專改削少陵嘗詆太白以自誇身分耳食者抵死奉若神明  
山左顏懋倫心不平獨往求見坐定卽問曰足下詩有書中  
乾蝴蝶二十首此委巷小家子題目李杜集中可曾有否屈  
默然慚人以爲快沈歸愚刻別裁集僅錄屈王母廟一首云  
秦地山河留落日漢家宮闕見孤燈如今應是蟠桃熟寂寞  
何人薦茂陵

鶴徵後錄卷第四

奉天子普保校

鶴徵後錄卷第五

嘉興李富孫旣汭甫輯

與試未用三十四人

王霖字雨豐一字雨楓號弁山浙江山陰人康熙乙酉舉人由  
內閣學士吳家騏薦舉後官直隸南宮知縣著有西山遊草弁  
山詩鈔

弁山七歲能詩至老篤學不倦上自漢魏下逮唐宋元明諸  
家靡不洞悉研究著作甚富令南宮時以清廉自厲民歌其  
惠歸田後設教西泠從遊者日衆

越風云弁山老人宗仰放翁恬吟密詠時見清標而卷帙之  
富亦復相似晚歲有集杜集陸等詩



詞科掌錄云王雨豐試日與會稽徐笠山聯席笠山不工爲排律卽用其詩爲考官所糾部議徐革職王補官日罰俸一年今官南宮令

詞科餘話云雨豐詞科被劾歸里頗有田園之樂感懷十律傳寫徧遠近同縣胡國楷敬方爲禮部主客司主事詩才敏麗日下少雙有次韻詩工力悉敵

吳麟姓吳查拉氏字子瑞號晚亭鑲黃旗滿洲人康熙戊子舉人原任內閣中書由禮部侍郎徐元夢薦舉著有黍谷山房集晚亭擅史才兼工山水意致蕭散晚更恬退自高其歸田雜興云敢效龐公去鹿門晚年生計落孤村隨人作苦甘驅犢課子勤農試灌園百畝有秋終歲望一家長物舊書存力田

求飽原非易追感從前稟祿恩八口人家斗大廬常閒心與世緣疏濟時技拙間行藥學古疑多敢著書老覺文章增活變新於習氣解消除行藏任運吾何事笑看浮雲自卷舒詞科掌錄云吳子瑞原任中書舍人與修明史與西林相國交好今爲明史綱目纂修官奏授中書

吳銳字穎長江南當塗人康熙辛卯舉人江都縣教諭由內閣學士方苞薦舉

先生力學好古孜孜如不及困於公車司教江都雖年已老猶日與諸生講論不輟

詞科掌錄云吳穎長任江都教諭年近七十矣

陳以剛字燭門江南天長人康熙壬辰進士池州府教授由安



徽巡撫王紘薦舉著有燭門詩

隨園詩話云天長詩人陳燭門進士余宰江寧蒙其過訪余愛買書而官廨甚小都堆簽押處故贈詩云六朝山立簾鉤外萬卷書橫簿領中卽姚武功印硃沾墨研戶籍雜經書之意

劉自潔字恒叔直隸武強人康熙癸巳進士原任翰林院編修由兵部尙書直隸總督李衛薦舉

孫見龍字叶飛號潛村晚號春齋浙江歸安人康熙癸巳進士原任翰林院庶吉士改補知縣由兵部尙書江蘇巡撫高其倬薦舉後官山西洪洞知縣著有五華纂訂四書大全潛村詩集潛村癸巳會試第一其第二名爲黃文虎時有龍虎榜之稱

學極該洽詩亦清超拔俗試後復薦充 咸安宮總裁令洪洞頗有政聲纂訂四書大全乃其掌教雲南五華書院時所輯故以五華爲名

詞科掌錄云孫叶飛少司空岷瞻在豐弟子也與竹溪沈幼牧皆少宗伯嚴存菴我斯之壻癸巳會元改庶常出令青浦以事去總督奉天高公合兩江士試于白下題爲時雨賦叶飛爲第一

戴蕞塘吳興詩話云孫太史嗜飲先祖作止酒歌以勸終以忤上官去任久主滇南五華書院費學士南英癸卯使滇贈詩云五華山院鬱蒼蒼十五年中華冊府別開吳下版酒槽爭壓會稽香門牆已徧青雲彥教授猶仍白髮郎顧我



昔曾呼小友不辭凝咽問蠻荒

丁凝字琴山號靜者浙江長興人康熙癸巳舉人國子監學正由詹事府詹事覺羅吳拜薦舉著有靜者詩集

靜者爲工部主事爾俊子幼穎敏年十三作詩有老成風長益肆力於古沿流溯源故其著作能自成一家

詞科掌錄云丁靜者國子學正今陞禮部司務爲沈宮贊三曾女夫故與竹溪諸沈酬倡最密

稗勺云余舉長興孝廉丁凝格於省試後復爲覺羅閣學吳拜薦於朝又被落亦命也

魏采若編云靜者束脩砥行沈毅有器識先是在成均時與諸名士結文酒之會驚才積學名動公卿所著篇帙甚

富

于栻字亦坡江南金壇人康熙甲午舉人通州學正由內閣學士伊爾敦薦舉

沈虹字衛梁一字涓梁江南長洲人雍正丙午舉人句容縣教諭由兵部尚書江蘇巡撫高其倬薦舉著有逢莊詩鈔

逢莊學問博洽工於詩嘗自編其所作以先後爲次每卷皆有自序紀其遭逢閱歷卽可以考其生平矣

李清藻字福建安溪人康熙丁酉舉人由刑部侍郎王紘薦舉

先生爲相國文貞公孫孝廉鍾倫子朝夕承學潛挈經義淵源有素屢上春官不得志弟清馥承蔭由郎官出守大名以



廉正著聲

李春耀字東谷湖北孝感人康熙丁酉舉人由工部尚書涂天相薦舉

詞科餘話云李春谷以鄉前輩大司空涂公薦來京試後病歿旅邸鄞縣全祖望釀金歸其櫬秀水萬光泰以詩哭之

查祥字星南號穀齋浙江海寧人康熙戊戌進士原任翰林院編修由刑部尚書徐本薦舉後充律例館纂修官著有雲在樓詩咸齋文鈔

先生學有淵源詩得家法律例館書成復七品京銜既歸歷主講席年八十餘卒

詞科掌錄云查星南庶常散館授編修原品休致丁巳歲補

試今爲律例館纂修官查氏門才甲於海內查田喜獎借後進查浦持律甚嚴星南少從查浦授詩故所作皆見矜慎厲鶚字太鴻號樊榭浙江錢唐人康熙庚子舉人由浙江總督程元章薦舉著有遼史補東城雜記湖船錄宋詩紀事南宋畫院錄樊榭山房集

樊榭之詩能於漁洋竹垞兩家外獨闢畦徑自成一派其幽深精妙窮極雕鏤譬如入幽崖峭壁幾乎斷絕人跡當時杭堇浦全謝山輩無不推服錢籜石翁有評本亦爲心折今海內言詩者標新領異務脫恒蹊多以樊榭一家爲宗

鮎埼亭集云樊榭少孤家貧其兄賣淡巴菰葉爲業以養之將寄之僧寮樊榭不可讀書數年卽學爲詩有佳句是後遂



於書無所不窺所得皆用之於詩故多異聞軼事爲人所不及知而最長於遊山之什冥搜象物流連光景清妙軼羣又深於言情故其擅長尤在詞深入南宋諸家之勝然其人孤瘦枯寒於世事絕不諳又卞急不能隨人曲折率意而行畢生以覓句爲自得其爲諸生也李穆堂閣學主試事闈中見其謝表而異之曰是必詩人也因錄之計車北上湯侍郎西厓大賞其詩會報罷侍郎遣人致意欲授館焉樊榭襍被潛出京翌日侍郎迎之已去自是不復入長安及以詞科薦同人強之始出穆堂閣學欲爲道地又報罷而樊榭亦且老矣乃忽有宦情會選部之期近遂赴之同人皆謂君非有簿書之才何孟浪思一擲樊榭曰吾思以薄祿養母也然竟至津

門興盡而返予諧之曰是不上竿之魚也嗚呼以懋榭爲吏固非所宜而以其清才使行吟於荒江寂寞之濱以死則不可謂非天矣

詞科掌錄云厲太鴻爲詩精深華妙截斷衆流鄉前輩湯少宰西厓先生最所激賞自新城長水盛行時海內操奇觚者莫不乞靈於兩家太鴻獨矯之以孤澹用意旣超徵材尤博吾鄉稱詩於宋元之後未之或過也性耽閒靜愛樂山水一再計偕遂絕意仕進以薦來都試題誤寫論在詩前遂罷歸生平詩逾萬首勇於刪擇樂府爲今海內第一仿計敏夫例爲宋詩紀事百卷摻采極富是科徵士中吾石友二人皆據天下之最太鴻之詩稚威之古文紹衣之攷證穿穴求之近



代罕有倫比紹衣丙辰先成進士改庶常例不當試後以散館出外稚威以疾太鴻以違式皆不得在詞館豈非命哉別裁集詩話云樊榭學問淹洽尤熟精兩宋典實人無敢難者而詩品清高五言在劉脊虛常建之間今浙西談藝家專以飢餓擗搯爲樊榭流派失樊榭之真矣

汪積山尊聞錄云太鴻出居道古翛然意遠詩文之外銳意於詞嘗病倚聲家冶蕩者失之靡豪健者失之肆因約情斂體深秀絲邈興至思集輒自比之孫氏一絃柳家雙璫要以自寫胸抱非求悅衆耳也有秋林琴雅四卷

吳甌亭雲蘄齋詩話云厲徵君肆力於詩鏤心役腎句雕字琢吾鄉百年詩人中殆難其匹性雅好遊所至搜剔名勝攬

葛攀藤裴回吟賞必興盡而後已集中西溪諸什直抒胸臆可當山經一卷讀也

蒲褐山房詩話云徵君性情孤峭義不苟合讀書搜奇愛博鉤新摘異尤熟於宋元以來叢書稗說以孝廉需次縣令將入京道經天津查蓮坡先生留之水西莊觴詠數月同撰周密絕妙好詞箋遂不就選而歸揚州馬秋玉兄弟延爲上客嗣後來往竹西者凡數載馬氏小玲瓏山館多藏舊書善本間以古器名畫因得端居探討所撰宋詩紀事遼史拾遺極爲詳洽其先世家於慈溪故以四明山樊榭爲號所作幽新雋妙刻琢研鍊五言尤勝大抵取法陶謝及王孟韋柳而別有自得之趣瑩然而清窅然而邃擷宋詩之精詣而去其疎



蕪時沈文愨公方以漢魏盛唐倡吳下莫能相掩也予於戊辰歲在長洲趙君飲谷小吳船遇之辱爲忘年交後徵君過吳必訪余於朱氏蘋花水閣凡三年而徵君下世矣至其詞直接碧山玉田予已錄入琴畫樓詩鈔故不具論又云樊榭下世葬於西溪王家塢因無子嗣不久化爲榛莽後四十餘年何君春渚淇游西溪田舍見草堆中樊榭及姬人月上栗主在焉取歸偕同人送武林門外牙灣黃山谷祠掃灑一室以供之予爲撰丈室花同天女散摩圍詩共老人參句以題其楹陶鳧香梁諸子皆有詩詞記之

鳧亭詩話云樊榭寶石山云林氣暖時濛似雨湖光空處淡於僧此真善於領畧西湖也其他如遊智果寺云竹陰入寺

綠無暑荷葉繞門香勝花元日對雪云無人可造真閑日有雪相娛此老翁山莊卽事云蔬圃鳥鳴秋境界竹房人語佛家風南湖秋望云橫塘秋水明菰葉老屋殘陽上蘚花皆佳句也

汪援甲字鱗先號漚亭浙江錢唐人康熙庚子舉人由都察院左副都御史孫國璽薦舉後官山西絳縣知縣著有夕秀齋詩鈔

漚亭爲處士汝謙曾孫博覽能文與兄振甲砥礪績學時有二難之目

俞鴻德字 浙江海鹽人康熙庚子舉人由內閣學士伊爾敦薦舉



先生與兄弟輩俱登科第當時有七鴻之稱嘗應春官試不  
得志薦舉詞科放還歿後無子今訪其著述亦散佚無存

萬邦榮字西田河南襄城人康熙庚子舉人由河東總督王士  
俊薦舉後官山東莘縣知縣著有紅崖草堂詩集

西田慷慨有才畧學亦奧博詩格如千尋老榦奇崛輪囷惜  
未得竟其所施有詩云南山石可耕俟時合高寄又云上書  
光範門斯亦賢者累可見其安命俟時矣

桑敬甫紅崖草堂詩序云萬君西田志堅而才雄平生萃精  
力於詩年近五十始領鄉薦既老一對大科終不遇浮沈史  
館出爲莘縣令僅三月卒於官卒後十年吾始來大梁書院  
君之子圃持君詩集乞序於予予受而讀之見其奇氣鬱勃

如雷奔濤立震蕩天地而清微窈眇則又若冷風吹空孤月  
在水飄然氛埃之外渺不可卽蓋其人固慷慨恢奇思有所  
建豎於時而墮坎不得志故勁絃無懦響其視人世蠅營狗  
苟之爲不值一唾故持身特峻潔而介立清音之孤發有由  
然也君旣晚不達得一同之地思爲古循卓以大攄其所欲  
爲不幸三月死矣其治譜粗見莘之人至今能道之自少爲  
諸生目擊流離沈痛惻怛以歌詩代監門之圖欲陳闔闔無  
由吾有以信君之爲政不苟同於流俗也弔古詠史誅姦發  
潛時出馱見君夙蘊之根氏畧見於此

徐本僊字

湖北蘄水人康熙庚子舉人雲南雲龍州知州

由署兵部侍郎王士俊薦舉



劉世澍字

湖南善化人康熙庚子舉人由總督倉場戶部

侍郎呂耀曾薦舉

車騰芳字

廣東番禺人康熙庚子舉人由廣東巡撫楊永

斌薦舉

汪祚字

江南江都人康熙庚子副貢生由都察院左副都

御史陳世倌薦舉

黃之雋字石牧號唐堂江南華亭人康熙辛丑進士原任左春坊左中允由刑部尚書徐本薦舉著有香屑唐堂等集

唐堂才華博瞻冠絕一時詩風流倜儻下筆不能自休著述甚富學尊程朱而排陸王時見於詩文中所編香屑集凡古今體九百三十餘首對偶工整渾若天成亦可見其記誦之

博運用之巧矣

唐堂後書目序云歲丁未之十月罷官歸囊篋無所蓄獨蓄書倍前遂并前所貯合爲目錄經史子集之正大者共二萬有餘卷餘雜細者八百八十餘冊不計卷附焉曩夢中得句云產業僅添書數種者是矣而惜乎已老矣目老而昏艱於視手老而倦艱於披口老而乾艱於讀心老而衰艱於思然猶強勉朝夕把一編老妻見輒諷曰是取第作官歸矣尙吾伊欲應舉耶予自惟幼習舉業誦孔孟程朱之書講求性命仁義之旨以闡發題目弱冠爲詩古文以迄於今於道終已無所發明而蹉跎老矣昔之所誦什不記一今之所誦什不熟一書增而學減爲可恥也聊錄其目以傳於家且自訟焉



詞科掌錄云黃石牧成進士授館職撰文稱

旨加 日講起居注官晉中允視學八閩以事落職錢唐徐公

薦於 朝試日詩賦既就日昃眼眇不能作字納卷出石牧

僻居陶宅風流自賞少時好爲輕豔詩通籍後門人海寧陳

編修邦直爲刻香屑集皆集唐豔體也千首中句無重出一

首中人無疊見又集唐人文句爲自序多至三千餘言嘉定

張檢討每服膺不去口可以當才子之目矣

詞科餘話云石牧試日以燭下不能作書日既夕遂舍去有

試博學宏詞不成自紀七十韻

別裁集詩話云雲間詩自陳黃門振興後俱能不入岐途累

累繩貫至盧文子後又日就衰隤渺所宗法矣唐堂學殖富

有而心思才力又足以驅策之故能自開生面仍復不失正軌謂之詩學中興可也

隨園詩話云黃石牧太史未遇時館於青浦盛氏范笏溪先

生訪之爲閨人所阻懊惱而返華亭至青浦已百里矣黃知

之深不自安贈詩云高鴻渺渺過無跡凡鳥匆匆去未思如

殺綠楊絲萬縷曾牽范舸在長堤後海寧陳文簡公延石牧

於家范所薦也范於黃爲先輩范卒後黃爲序其四香樓詩

集而述其在葉忠節公席上贈欠山詩云有客夜歸迷舊路

隔村樹黑遠疑山又黃石牧先生以翰林中允督學閩中因

公落職吾鄉徐文穆公薦舉鴻博與余同試 保和殿先生

年過七旬神明衰矣以不完卷累薦主議處蓋馬伏波自忘



其老之過也唐堂詩集生新超雋美不勝收姑錄短句以志  
一嚮之嗜芭蕉云日不紅三伏天惟綠一菴北路買餅云駐  
馬一錢交易羈留三刻行程玫瑰花云生來合是依人命從  
不容渠在樹看集中七古遠勝潘稼堂又云楊花詩最佳者  
前輩如查他山云春如短夢初離影人在東風正倚闌黃石  
牧云不宜雨裏宜風裏未見開時見落時嚴遂成云每到月  
明成大隱轉因雲熱得佯狂

顧棟高字復初一字震滄又自號左畚江南無錫人康熙辛丑  
進士由兵部侍郎署江蘇巡撫顧琮薦舉乾隆辛未以經學徵  
官國子監司業習祭酒著有尙書質疑春秋大事表毛詩類釋  
震滄集

先生者儒碩學望重一時於治經尤深於春秋大事表一書  
兼綜條貫非掣究數十年不能有此精當經學之徵大理寺  
卿鄒一桂以老成謹厚淹貫經籍保薦時 命閣部大臣於  
所舉中核其名實允孚者得四人常熟陳祖范金匱吳鼎介  
休梁錫璵及先生得

旨召見問以治道先生以儉德示天下對詢不媿儒臣之言  
詞科掌錄云顧震滄深於經學文不多見有爲其鄉人吳鼎  
三正攷序一首鼎字岱巖考凡二卷援据亦博

蒲褐山房詩話云震滄先生少與蔡進士德晉吳孝廉鼎精  
心經術尤長於春秋旣捷南宮官中書以奏對越次罷官遂  
不復出所著大事表萃公穀之微言正杜孔之義疏凡軼羈



紛紜之說悉爲定其指歸表而出之蓋宋元以後諸儒無其  
精確也乾隆辛未以經學徵 賜官國子監司業未就丁丑  
迎 鑾晉祭酒銜時年幾八十矣是時寓維揚者數月猶見  
其撰毛詩類釋先生不好吟詠而大事表後附論春秋詩皆  
無關風雅

梁機字仙來江西泰和人康熙辛丑進士原任翰林院庶吉士  
改補知縣又改教授未補由大學士朱軾薦舉著有北遊草趙  
遊日記三華集

仙來少時卽負才名嘗從漁洋山人得受詩法詣極超雋其  
自編三華集一曰入洛志勝多題詠古跡之作一曰燕雲詩  
鈔隨侍其父官遊京邸之作一曰徵草爲 召試入都之作

一曰還草則試不入格歸途之作也

詞科掌錄云梁仙來庶常未散館改知縣又改儒學教授弱  
冠卽負異才父弓以庶常授武庫司主事仙來來京省謁處  
士北平王源或菴愛其才卽有婚姻之約

詞科餘話云仙來以庶常出知山西某縣與江西巡撫常公  
鼐同官有素常公屢以書幣延之仙來固辭不出其從子欽  
自京寓書勸其應 詔仙來答數百言其文甚偉書云阿叔  
躡躡名場幾三十年幸際

聖朝備員中外中間爲當路喜怒所中年方知命退託山林引  
分守拙日惟學易以求寡過亦遂有終焉之志邇者 詔開  
博學鴻詞之科羅淹貫之士以昭 文治潤鴻猷海內夙負



博雅沈滯未達之耆舊早歲慧辨健文通藝之英銳與夫失職能文章之臣思用其所未足者莫不峩冠振策欣然自慶其遭逢而

聖朝所爲殊科優擢一試卽列之清要者要皆未易才也汝猥以阿叔素號多聞又爲朝士所推致書忱忱勸之就試意良厚顧君子立身自有本末出處大節詎容苟違於道阿叔弱歲遊輦下與時賢豪角逐游藝之場自顧胸中亦頗有知識棄置以來雖不廢藝情而道心頗重於所慕固有一率履不敢越者頃聞明詔未嘗不爲天下之績學者慶又未嘗不爲已之處地與勢情也蓋欲阿叔之就此選其不可乃有三焉夫已列朝簪不能奮立功名有故而去方當思過之不

暇不然旣俯仰可自安矣則益志道樹德以謝當時之望用舍一聽之世而已乃欲復以語言文字爲梯榮之藉縱不自醜故態能免高人鄙笑乎其不可一也往者康熙己未開是科亦并及失職之臣當時但詔內外大臣擇薦以其姓名上而已試事則惟

天子親主之就之猶可也今在外則先試於督撫矣此在朝廷恩意濶徧必俾之鄭重以免叨濫而在臣子愛惜國體則一揆諸理道以爲避就阿叔忝竊侍從在詞館屢經

御試曾邀殊恩受

勅命官雖降調而故階尙在乃與老不得科第輩及後生小子低首下心搖筆呶語塗雅於戟門之內其顏之厚豈獨羞士



論抑且辱 朝廷而 朝廷又焉用此不自慚之博學鴻詞  
爲也其不可二也芟帛蒲輪古來徵隱遜者以道不以藝也  
如以藝則功名之士耳顧躡嘉遜之跡爲慕道之人猶懷鉛  
挾槩角藝以干進古今曾聞此有道之隱遜乎此又北山之  
文所不屑移者也其不可三也汝在仕路貴游多高明試出  
愚言質之并以謝勸駕諸君子當不至河漢而不謂然蓋人  
心之同然者道也况在正誼明道之君子乎

隨園詩話云庚申在京余與裘叔度同年同車遇雨裘誦其  
師梁仙來太守一聯云飛雨不到地輕煙吹若塵高安相公  
薦鴻博入都與余相遇於琉璃廠書肆中詠桃花云渾疑人  
面隱下馬誤題門贈妓云欲作歌聲畏花落選詞先唱鎖南  
枝鬢篋云老去還嗟耳力退自次羌管不聞聲沙邱云荆卿  
七首漸離筑可惜不逢祖龍三十六

梅枚字功升號慕堂江西南城人康熙辛丑進士河南儀封知  
縣由河東總督王士俊薦舉後陞山東泰安知府

慕堂以縣令被薦 召試後仍還任候進止吾鄉錢文端公  
有送其還河南詩云梅君古文學我友之所畏作令別十年  
轉徙梁宋地所居無威名頗師保障意王公領三州

天子方倚畀緇衣感風詩往往好是懿先以循良徵復以鴻博  
被姓氏入 楓宸遭逢實茲始最績著上考閣門應明試千  
言寸晷成縱筆無贖思吾老輒倒禰對之能不愧行矣且之  
官其以吾言治曾賓谷臬使詩徵以薦舉後改官翰林殊誤



詞科掌錄云梅功升任儀封令平越王公所薦 召入先試  
卷封內閣陞泰安知府卒官

曾賓谷江西詩徵云慕堂少遊豫章與知名士九十餘人相  
切劘顏其堂曰正學成進士授河內知縣擢禹州薦舉鴻詞  
適報最入 觀遂先試

鄧牧字乃夢江西南豐人康熙辛丑進士撫州府教授由江西  
巡撫常安薦舉

吾鄉諸草廬有懷南豐鄧乃夢詩云燕臺判袂垂三載眼訝  
清江雙鯉無萋萋碧草東西路渺渺雲山大小孤春風麗箋  
鬪玉茗夜雨畫榼傾麻姑冷官著述貧亦好腰折眉摧何所  
須先生亦有聞諸在金華詩 召試報罷尋卒

詞科掌錄云鄧乃夢主臨川李侍郎家與侍郎弟巨州秀水  
諸教諭襄七鄞縣全吉士謝山倡酬最富

吳王坦字衷平榜姓王江南華亭人雍正癸卯進士廣西永福  
知縣由廣西巡撫金鉉薦舉後陞平樂府同知

衷平祖世龍父熙俱善詩畫衷平釋褐選庶吉士散館改官  
行人出知永福縣撫輯備至徭獍悅服權攝義寧前令因苗  
亂招撫被害衷平泣任卽集吏民諭以大義防禦嚴密賊因  
畏威遠竄 召試後行取擢平樂同知以病乞歸卒

何夢篆字 江南江寧人雍正癸卯進士廣東新安知縣由  
廣東巡撫楊永斌薦舉

張振義字 江西龍泉人雍正癸卯進士直隸趙州寧晉知



縣由大學士朱軾薦舉

徐文靖字容尊號位山江南當塗人雍正癸卯舉人由兵部尙書甘汝來都察院左都御史孫嘉淦交薦舉乾隆壬申特授檢討著有山河兩戒考禹貢會箋皇極經世考管城碩記

位山學極淹博貫串羣言僻於好古其所撰述甚多已巳

詔舉明經之士安徽巡撫衛公哲治卽以淹貫經史薦之王申會試禮部榜發 恩命落第舉子年逾耄耄者給與新銜位山特授檢討誠異數也

詞科掌錄云徐位山嘗爲佛手柑賦穿穴梵夾驚絕流輩又嘗以之乎者也矣焉哉七字冠首爲七言長句十章其仲子脊樞應滋亦佳士博求故實逐句爲訓

全謝山經史問答云三十六宮之說偶與當塗徐檢討容尊語及之曰君不讀擊壤集詩乎物外洞天三十六都疑布在洛陽中小車春暖秋涼日一日祇能移一宮是非三十六宮之明文乎天根月窟老氏之微言也三十六宮圖經之洞天福地也其必以復姤之說文之者猶之參同必以乾坤坎離分氣值日而究之參同契之用易非聖人作易之旨也檢討所著管城碩記最精博有考據

隨園詩話云乾隆間以老受 恩得官者當塗有二人焉徐

位山曹洛禪徐同余丙辰 召試年九十餘授翰林院檢討

甲戌秋寄所註竹書紀年詩一冊來湖居云天將幽致敝湖濱共我盤桓幾十春守業願爲清白吏著書羞傍草元人妻



緣貧慣無交謫子未驕成肯負薪那得向平昏嫁畢三江烟  
雨任垂綸白駒幾向隙間過荏苒年華長薜蘿閒極有時評  
北苑愁來無夢寄南柯文標司馬尊元符帖檢來禽署永和  
湖上遊行湖上立頽唐老大竟如何又雲生漸覺桐絃潤潮  
上徐看釣艇斜酒緣齋日陳三雅茶爲眠時試一槍皆典雅  
可誦。

李金瀾遇孫云位三管城碩記三十卷條辨經史疑義旁及  
楚詞詩賦字學等類分門編次極爲精洽興縣孫文定公序  
稱其先前人之言以發其端加案以發其義著事以徵其實  
博引羣書祛疑從信不妄參以己意

魏允迪字功夏號懋堂江西廣昌人雍正癸卯舉人由兵部尙

全謝山經史問答云三十六宮之說偶與當塗徐檢討容尊  
語及之曰君不讀擊壤集詩乎物外洞天三十六都疑布在  
洛陽中小車春暖秋涼日一日祇能移一宮是非三十六宮  
之明文乎天根月窟老氏之微言也三十六宮圖經之洞天  
福地也其必以復姤之說文之者猶之參同必以乾坤坎離  
分氣值日而究之參同契之用易非聖人作易之旨也檢討  
所著管城碩記最精博有考據

隨園詩話云乾隆間以老受 恩得官者當塗有二人焉徐  
位山曹洛禪徐同余丙辰 召試年九十餘授翰林院檢討  
甲戌秋寄所註竹書紀年詩一冊來湖居云天將幽致啟湖  
濱共我盤桓幾十春守業願爲清白吏著書羞傍草元人妻



緣貧慣無交謫子未驕成肯負薪那得向平昏嫁畢三江烟  
雨任垂綸白駒幾向隙間過荏苒年華長薜蘿開極有時評  
北苑愁來無夢寄南柯文標司馬尊元符帖檢來禽署永和  
湖上遊行湖上立頽唐老大竟如何又雲生漸覺桐絃潤潮  
上徐看釣艇斜酒緣齋日陳三雅茶爲眠時試一槍皆典雅  
可誦。

李金瀾遇孫云位三管城碩記三十卷條辨經史疑義旁及  
楚詞詩賦字學等類分門編次極爲精洽興縣孫文定公序  
稱其先前人之言以發其端加案以發其義著事以徵其實  
博引羣書祛疑從信不妄參以己意

魏允迪字功夏號懋堂江西廣昌人雍正癸卯舉人由兵部尙  
書甘汝來薦舉後官內閣侍讀

懋堂家本貴顯意氣自豪盛劍山有詩懷之云番刀啟和璞  
刻作夷門雲椎牛鬯古鼎持壽信陵君上邪甲與乙要結徒  
紛紛可想見其概

詞科掌錄云魏功夏長於考證辨著甚多今授內閣中書舍  
人。

隨園詩話云魏懋堂豪邁不羈官中書侍讀以撫軍公子而  
家資散盡因之失官詠山中積雪云寂寞山涯更水濱漫天  
匝地白如銀前村報道溪橋斷可喜難來索債人干霄篁竹  
翠盈眸雪壓風欺撲地愁莫訝此君無勁節一經淪落也低  
頭又出門云憑著牽衣兒女送只揮雙淚不回頭讀之令人



神傷與余同 召試友也

饒一辛字冶人江西廣昌人

一作南城人

雍正癸卯舉人新建縣教

諭由順天府府尹陳守創薦舉著有經義管見

先生學覃經學管見一冊列易圖說七多發連山歸藏之義  
又周易統天旋卦賦一說卦傳論一納音五行論一古今本  
得失論一凡數則合題曰先甲堂經義初刻尙有諸經著述  
惜未得見

鄭長慶字

江西貴溪人雍正癸卯舉人由戶部侍郎李紱

薦舉

曹廷樞字古謙號六菴浙江嘉善人雍正癸卯副貢生由內閣  
學士吳家騏薦舉著有謙齋詩集

書甘汝來薦舉後官內閣侍讀

懋堂家本貴顯意氣自豪盛劍山有詩懷之云番刀啟和璞  
刻作夷門雲椎牛釁古鼎持壽信陵君上邪甲與乙要結徒  
紛紛可想見其概

詞科掌錄云魏功夏長於考證辨著甚多今授內閣中書舍  
人

隨園詩話云魏懋堂豪邁不羈官中書侍讀以撫軍公子而  
家資散盡因之失官詠山中積雪云寂寞山涯更水濱漫天  
匝地白如銀前村報道溪橋斷可喜難來索債人干霄篁竹  
翠盈眸雪壓風欺撲地愁莫訝此君無勁節一經淪落也低  
頭又出門云憑著牽衣兒女送只揮雙淚不回頭讀之令人



神傷與余同 召試友也

饒一辛字治人江西廣昌人

一作南城人

雍正癸卯舉人新建縣教

諭由順天府府尹陳守創薦舉著有經義管見

先生學覃經學管見一冊列易圖說七多發達山歸藏之義  
又周易統天旋卦賦一說卦傳論一納音五行論一古今本  
得失論一凡數則合題曰先甲堂經義初刻尙有諸經著述  
惜未得見

鄭長慶字

江西貴溪人雍正癸卯舉人由戶部侍郎李紱

薦舉

曹廷樞字古謙號六菴浙江嘉善人雍正癸卯副貢生由內閣  
學士吳家騏薦舉著有謙齋詩集

六菴少承家學篤志好古丰神韶秀不媿養炬覽舉之日詩  
文俱極清婉廣陵舟次留別厲樊榭詩云君暫停橈廣陵驛  
去留意緒總難堪雲山一路愁兼別風雪三年北又南獻賦  
漫勞尋往事挑燈不盡接深談歸來好傍西溪住筇杖屨鞋  
取次探弟廷棟善詩歌工分隸名亦相亞

詞科掌錄云曹古謙少宰蓼亭之孫烏衣子弟羣屐風流在  
羣從中允爲韶令天資敏慧悅學不倦故所就大可觀

詞科餘話云古謙廣陵舟次留別厲太鴻太鴻次其韻有前  
輩風流空日下故人憔悴滿江南句傳誦一時

別裁集詩話云古謙應博學鴻詞 詔入都日課一賦一詩  
同人斂手推讓試後放歸復入都病歿



隨園詩話云嘉禾徵士曹古謙與葛卜元同教習 宗學葛  
 北方人長於考据自負博雅而曹專工詞章二人不相能虞  
 山蔣公滿洲世公各有所庇遂相參劾古人洛蜀之分皆由  
 門下士起也曹詩自佳詠春雨云兩兩溪邊水鳥呼漸看檐  
 際濕模糊憑闌花重紅疑滴隔座山橫翠欲無吟苦莫愁春  
 冷淡病多偏穩睡工夫卷簾自愛虛無景未要瀟湘入畫圖  
 曹嶺字 廣東保昌人雍正癸卯副貢生由刑部侍郎楊超  
 曾薦舉

鶴徵後錄卷第五



東陽盧炳坦校









70012543



